

29/01/2001

Bekas penyelarass PBB di Iraq sanjung usaha Malaysia

Kuzaimah Idris

KUALA LUMPUR, Ahad - Bekas Penyelarass Kemanusiaan Pertubuhan Bangsa-Bangsa Bersatu (PBB) ke Iraq, Hans Von Sponeck, menyanjung peranan konstruktif Malaysia dalam usaha meningkatkan kesedaran masyarakat antarabangsa supaya menarik balik sekatan terhadap Iraq.

"Saya mesti berkata ketika berkhidmat di Baghdad, peranan konstruktif Malaysia dalam cuba meningkatkan kesedaran mengenai realiti di Iraq kepada masyarakat antarabangsa sangat menarik.

"Saya dan rakan-rakan di Baghdad sentiasa menyanjungi Malaysia kerana pendirian beraninya, dan Malaysia satu-satunya anggota bukan tetap Majlis Keselamatan PBB yang berani dan lantang," katanya.

Dalam satu temubual di sini, Von Sponeck berharap, walaupun Malaysia tidak lagi berada dalam Majlis Keselamatan, suara Malaysia akan terus kedengaran dalam usaha menamatkan satu dasar yang pincang.

Von Sponeck berada di sini awal minggu ini atas jemputan penaung Persatuan Wanita Se Pasifik dan Asia Tenggara di Malaysia, Datin Seri Dr Siti Hasmah Mohamed Ali.

Beliau menyampaikan ceramah pada Isnin lalu dalam forum umum yang dianjurkan persatuan itu mengenai kesan sekatan PBB terhadap wanita dan kanak-kanak Iraq.

Von Sponeck, seorang warga Jerman bertanggungjawab untuk program minyak bagi makanan PBB yang diperkenalkan pada 1996 untuk membenarkan Iraq berurus niaga minyak bagi mendapatkan keperluan asas, meminta dilepaskan daripada tanggungjawab itu kerana menurutnya program berkenaan gagal memenuhi keperluan kemanusiaan penduduk Iraq seramai 22 juta orang.

Sejak melepaskan jawatan itu, Von Sponeck yang mempunyai 30 tahun pengalaman dalam Program Pembangunan PBB sudah melawat 15 negara dan menyampaikan mesej membantah sekatan ekonomi itu.

Pegawai sebelum Von Sponeck, Dennis Halliday, juga meninggalkan jawatan itu pertengahan 1998 selepas menyuarakan bantahan sama terhadap sekatan yang dikenakan terhadap Iraq berkuat kuasa 2 Ogos 1990 selepas mencero boh Kuwait.

Sehubungan itu, Von Sponeck menyarankan Malaysia agar turut membawa sebilangan penuntut negara ini untuk bertemu rakyat Iraq sekiranya mengadakan satu lagi lawatan ke Iraq.

"Saya memberitahu Datuk Seri Dr Mahathir Mohamad, jika ada satu lagi lawatan Malaysia ke Iraq, dapatkan sebilangan penuntut Malaysia untuk bertemu rakyat Iraq, bukan pada peringkat politik tetapi pada peringkat kemanusiaan untuk menyedarkan yang lain bagaimana rasanya untuk hidup dalam keadaan seperti itu," katanya.

Sambil merayu masyarakat antarabangsa supaya menarik balik sekatan terhadap negara itu yang dilanda kesengsaraan, beliau berkata, sekatan itu gagal mencapai matlamatnya dan ia membawa padah ke sasaran yang salah.

Katanya, atas sebab perikemanusiaan masyarakat antarabangsa tidak dapat menunggu, walaupun sehari dalam menyelesaikan isu itu kerana sekatan hanya membawa kesengsaraan teruk kepada populasi awam Iraq.

"Sekatan ekonomi yang dikaitkan dengan pelucutan senjata adalah dasar yang menghukum sasaran salah. Sejak 10 tahun lalu kita menyaksikan lebih banyak lagi bukti yang mangsa sebenar sekatan itu ialah kanak-kanak di Iraq," katanya.

Ditanya sama ada rakan-rakannya daripada agensi PBB yang lain bersetuju dengan pandangannya berhubung sekatan itu, beliau berkata: "Secara emosi

mereka berpendapat sama, tetapi atas alasan tertentu dan pertimbangan lain, mereka tidak bersedia mengambil pendirian agresif yang sama seperti saya ambil."

Sekatan PBB menghalang eksport produk petroleum dari Iraq serta penjualan dan pembekalan semua produk ke negara itu, termasuk senjata dan peralatan ketenteraan lain serta pemindahan wang ke Iraq.

Von Sponeck berkata, kadar kematian di kalangan kanak-kanak Iraq meningkat lebih dua kali ganda sejak sekatan itu dikenakan dengan 50,000 kematian dilaporkan setahun dan 142 kanak-kanak mati setiap hari.

"Penyakit seperti taun, kepialu, pneumonia dan pemakanan tidak seimbang adalah pembunuh utama kanak-kanak di bawah usia lima tahun. Ini realiti dan dengan mengetahui ini anda meneruskan dasar yang sama, bermakna anda bersalah dan dituduh bertanggungjawab bagi punca-punca yang membawa kepada penyakit dan kematian," katanya.

Pengangguran mencapai antara 60 dan 75 peratus dan sebahagian besarnya kerana hampir semua kilang ditutup.

"Saya bukan pembela Kerajaan Iraq, tetapi adalah jelas dan ditunjukkan dalam laporan dengan saya sendiri melihatnya di Iraq ketika berada di sana selama 17 bulan," katanya.

Von Sponeck yang mula memegang jawatan itu pada September 1998 dan tinggal di Baghdad ketika Iraq dibom oleh tentera bersekutu pada Disember tahun itu, berkata:

"Dasar berkenaan perlu diubah atas dua sebab. Pertama, masyarakat yang sengsara dan kedua dalam jangka panjang undang-undang antarabangsa dicabuli. Ini adalah dua sebab yang memberi motivasi kepada saya untuk mengembara, memberikan masa dan harapan saya yang kerajaan serta masyarakat akan semakin sedar mengenai hal ini."

Beliau berkata, tanpa mandat Majlis Keselamatan PBB dan tanpa apa-apa asas perundangan, kesedaran yang diwujudkan seperti menerusi usahanya mewujudkan suasana yang mana Kerajaan British kini sanggup memikirkan semula pendekatannya.

"Saya juga berharap pentadbiran baru Amerika akan meneliti dengan lebih cermat sebelum ia memperketatkan kedudukannya mengenai Iraq. Ia harus mendapat taklimat semua pihak supaya dapat memahami gambaran lengkap mengenai Iraq yang begitu rumit," katanya.

Ditanya sama ada Iraq memenuhi kewajibannya terhadap PBB untuk membolehkan PBB menarik balik sekatan, Von Sponeck berkata: "Iraq telah mematuhi dalam banyak cara, masalahnya ialah dengan resolusi yang teksnya tidak jelas dan oleh itu tertakluk kepada pelbagai tafsiran."

"Ini paling malang... sepatutnya ada bahasa yang lebih bersih, tegas dan telus untuk memutuskan dengan jelas sama ada Iraq telah mematuhi kewajibannya atau tidak," katanya.

Von Sponeck meminta dialog di kalangan semua pihak untuk mencari jalan keluar daripada 'realiti manusia malang' di Iraq.

Mengenai program minyak bagi makanan, beliau berkata walaupun program itu penting bagi kelangsungan hidup populasi awam Iraq, ia masih tidak memadai dan tidak dapat memenuhi keperluan populasi Iraq.

"Rakyat Iraq mendapat bekalan kemanusiaan bernilai AS\$100 seorang setiap tahun daripada program itu, itulah saja yang dimiliki oleh Iraq. Saya jangka itu saja sudah cukup untuk anggota-anggota Majlis Keselamatan memikirkan semula sama ada ia adalah pendekatan masyarakat antarabangsa yang wajar diusahakan dalam menyelesaikan kemelut itu," katanya.

Ditanya sama ada rakyat Iraq menganggap beliau sebagai penyelamat, beliau berkata: "Saya tidak mahu menjadi fanatik. Saya mahu dilihat sebagai orang suruhan antarabangsa yang mahu meningkatkan kesedaran akan implikasi dasar yang salah, impak dasar yang salah dan implikasinya jika diteruskan."

"Jikapun ini bermakna orang Amerika akan berkata lelaki ini adalah orang suruhan Kerajaan Baghdad, orang bodoh yang dipergunakan oleh Iraq, itu suatu tanggapan yang tidak benar, kerana saya bukan begitu," katanya.

Adakah nyawa beliau terancam kerana berkempen menentang sekatan PBB? Dengan senyuman beliau menjawab: "Ya, tetapi saya tak kisah, saya tidak takut. Saya model peranan yang berkuasa, ayah saya dihukum mati kerana menentang Hitler, saya belajar daripadanya."

Jeneral Hans Von Sponeck (sama nama dengan anaknya) dipenjara pada 1942 kerana tidak mengikut perintah Hitler dan menarik balik 120,000 anggota tentera dari Russia. Beliau kemudian terbabit dalam komplot untuk membunuh Hitler pada 1944 menyebabkan dihukum mati.

Von Sponeck berkata, beliau hanya berusia lima tahun apabila ayahnya ditembak mati.

"Saya masih ingat dan ibu saya sentiasa mengingatkan saya yang kejujuran bertahan lebih lama, ia menjadi simbol," katanya. - Bernama

(END)